



E WATAPANA

E aña aki ta 25 aña cu "Aruba Dushi Tera" ta nos himno nacional. Tambe 25 aña cu nos bandera ta e simbolo oficial di nos isla. Nos escudo si ta den uso oficial caba desde 1955.

Pero boso sa cu Aruba tin un mata nacional tambe? Esey ta e palo di Watapana, e simbolo di resistencia y speranza.

Su nomber latin ta *Caesalpinia Coriaria*, e nomber indjan ta "Guatapana" y nos ta bisa simplemente Watapana. E nomber divi-divi a bin di Curaçao. Tempo cu nan tabata exportá e boonchi o fruta di Watapana for di antiyas pa Europa, nan a usa e nomber Divi-Divi tambe. Durante siglo 17 Watapana tabata wordo piki na Aruba,

Bonaire y Curaçao, y bendí cu paisnan Europeo.

E fruta ta un baliña tur lorá (gekrul) cu ta contene tanino. Na Europa - especialmente na Hamburg - nan ta saca e tanino y usé den curtimento di cuero di bestia. Esaki ta bira un cuero corá di cual

nan ta traha zapato, bota, etc.

E Watapana ta crece den direccion west, manera cu e biento ta mand'é. Dos biaha pa aña e ta duna cosecha, na januari y na juli. Asina awa jobe e mata ta bira berde y cuminsa floria. Pero si awa jobe di mas, e baliñanan ta bira preto y no ta sirbi mas pa exportacion.

E industria aki tabata duna hopi hende trabao temporalmente. Nan tabata jena saco cu boonchi y hib'é pa e doño di cunucu. Pa cada saco di 20 kilo nan ta haya diez placa. Despues tin cu selectá e baliñanan pa kita lodo of saca baliñanan berde of preto. Un baliña berde no tin tanino, pues no ta sirbi.

E industria aki a caba despues cu nan a descubrí tinta sintetico cu tabata mas barata.

Por bisa cu e industria aki tabata un di mas bieo di Aruba.

Tempo cu Aruba Jaycees Female Chapter



a bin cu e idea pa un Botanical Park na San Nicolas den un area cu tin mas diferente sorto di mata di Aruba, nan a bin tambe cu e idea y alavez a haci un peticion na gobierno pa declará e Watapana como e Mata Nacional di Aruba. Esaki a wordo aceptá na aña 1979.



Chabalito

Number 6 - Año XII

